

Ya cu Parlamento a haya conseho 'positivo' riba rapport dudoso di MER

“Grupo di residentenan afecta Urirama” ta hiba Gobierno corte

ORANJESTAD - Despues di a studia e concept-rapport y e rapport final di Commissie MER, y tambe scucha diferente declaracionnan infunda di Gobierno di Aruba y Parlamentarionan di Aruba, e comision representando e Residentenan Afecta di Urirama dicidi cu nan ta entama un caso contra Gobierno.

Nan pensamiento ta entre otro cu nan ta lamenta cu despues cu e Residentenan Afecta di Urirama a trece expertonan di exterior na Aruba pa elabora den tur detaye riba e efectonan riba salud di hende, cu e proyecto di Turbinanan di biento lo trece cune, na luga di duna oido na e hechonan prueba cientificamente, Gobierno a kies pa atakenan infunda riba e profesionalnan en cuestion.

ORADOR

Pa Gobierno di Aruba si ta bon pa profesional di Harvard University ta orador na Green Conference of pa papia na favor y bende e proyecto di turbina di biento, pero ora un otro profesional tambe asocia na Harvard University splica su studio cu ta peer-reviewed y ta conclui cu tin consecuencia pa salud di e ser humano, mesora e profesional aki ta ser ridiculisa y tilda di no ta imparcial.

Mientras e profesional aki a haci un pionier study cu ya caba ta halando atencion internacional.

Segun e grupo, no por husga e pruebanan y informacion hancra den e rapport di Dr. Nissenbaum y Robert Rand a base subhetivo, ora esey ta cumbini gobierno. Si kier prueba cientifico anto mester laga ciencia

husga ciencia, y esey a wordo haci cu e estudio di Dr. Nissenbaum. Pa tur claridad, segun e grupo, e MER rapport no ta un estudio cientifico sino un rapport presenta pa e doño di e di e proyecto. Y segun e grupo, esey si ta parcial.

E grupo ta sigui bisa cu ta tristo pa tende declaracion di nos Gobernantenan ta burla di e estudio cientifico dor di compara e zonido di Turbina di Biento Industrial cu e zonido di un aircro window unit, pero tambe di tende con nos Gobernante ta burla di e pueblo di Noord dor di referi na tur esnan di Noord como Elitenan.

Nan ta haya cu ta di lamenta cu e pueblo di Noord no tabata merece un estudio di salud hopi mas profundo y extenso y serio pa descarta cualkier consecuencia pa salud. Pa cita e rapport di Commissie MER: “Gegeven de korte adviesperiode en de budgettaire beperkingen kon een advies op maat met specificatie naar de lokale situatie en concrete inrichting niet plaatsvinden.”

Ta tristo tambe segun e grupo, cu pa un asunto asina importante cu ta trata salud di 3000 HENDE ni Parlamento di Aruba, ni Gobierno di Aruba tabata dispuesto pa pone, ni un presupuesto realistico, ni e tempo necesario pa hasi un estudio profundo. Nos ta kere cu forma di traha aki ta carece di sinceridad y seriedad.

LESAMENTO SELECTIVO

Nan por a constata tambe cu nos Gobernantenan y algun Parlamentarionan ta practica lesamento

selectivo. Nos por a mira con algun Parlamentarionan a saca conclusion cu Turbina di biento no tin consecuencia pa salud, a base di e conclusion confuso di e rapport di Commissie MER. Nan ta cita di punto 2.3 Commissie MER: “Directe gezondheidseffecten door laagfrequent- en/of infrageluid en/of trillingen zijn daarom niet te verwachten.”

Si lesa e rapport di Commissie MER den su totalidad, Commissie MER ta alerta Gobierno di Aruba y Parlamento di Aruba, cu hasta si cumpli cu normanan di Hulanda, esaki por tin consecuencia serio pa salud.

Nos ta sita di rapport di Commissie MER: “Het voldoen aan de normen betekent niet dat geen hinder, slaapverstoring en - als gevolg hiervan - mogelijk andere gezondheidseffecten kunnen optreden. Ook onder de norm kunnen (ernstige) hinder en (ernstige) slaapverstoring optreden.”

Salud ta un di e derechonan fundamental di ser humano y e prome responsabilidad di gobernantenan y mester trat’e cu suma precaucion. Pa es motibo aki nan no por compronde e conseho di Commissie MER unda cu e ta recomenda Gobierno di Aruba/ Parlamento di Aruba pa continua cu e proyecto di Turbinan di biento y atende e consecuencianan pa salud despues.

Ta falta di seriedad si dicidi pa continua cu un proyecto cu di antemano bo sa cu lo tin consecuencia pa salud publico bou di e pretexto di por atende cu e consecuencianan negativo despues. Unabes salud di e ser humano wordo

afecta, ta dificil pa recupera esaki.

COMISSIE MER

Ta pa e motibo aki nan por solamente conclui cu Commissie MER no tin un idea cu trata aki di casi 3000 hende cu ta biba den e circulo di 2km di e proyecto aki. Fuera di esey den e MER por wordo lesa cu Aruba no tin normanan stipula.

Nos ta puntra nos mes, si no tin ley cu ta stipula normanan, ta con por sanciona si e comerciante di e turbina di biento no ta cumpli? Tambe e rapport di MER ta papia cu mester haci un “belangenafweging”. Pero si no ta conoci kico e criterionan ta pa midi, con por haci tal?

Con por ta cu no ta transparente kico e supuesto beneficienan ta di e turbina di biento (y pa kende fuera di e comerciante di molina), mientras ta sacrifica salud di mas cu 3.000 hende. Pasobra na nos hermana isla Boneiro por a lesa den corant cu e comerciante di molina mester wordo paga su parti mientrastanto esey tin como consecuencia cu pueblo di Boneiro mester paga 50% mas riba su cuenta di coriente!

CORTE

Segun e grupo, mirando cu e desaroyado ta sigui cu trabounan sin cualkier tipo di permiso necesario, pa colmo cu e bendicion di gobierno y mirando cu parlamento no tin fin pa yama un reunion publico, no ta keda ningun otro opcion cu bay corte y entama diferente proceduranan legal pa asina salvaguardia e interes general di pueblo Aruba. □